

Txiau

Txiau Ryberiti

1 ¹Jiarỹ Txiau rare. Deuxu Jesuisi Kristu Inynyrỹ-wana deõdu rare. Rõritidỹreri Deuxu mahãdu inatyhy-õ. Ubỹtỹmy iny rỹira mahãdu-õ. Warybe weityhyna adeereny rewahinyreri.

²Waityhydỹydu aõna aõnasira seriõre, araurihixinanykeki adeereny kanamyhỹkeki, beysamahãbenyke. ³Kia-di tahe ityhydỹydu tyhymy beleke. ⁴Aurihixina ixinamy rexiõlõnyke atyhykemy. Ixinamy kanake araurihikemy. Tai tahe raõbitidỹnykre adee aõ rasiranyõtyhy.

⁵Inyõ bedeery ihoõkeki, rexitõenykre Deuxu dee, tii dori ibutu dee riwahinymyhỹre. Inyõ lau dori ritðenyõhymyhỹre. ⁶Urile tii iseõdỹyõmy bexityhynymy tamy bexitõenykre. Riseõnykeki yhy õbõ-di tiõ rehumyhỹre wese rare. ⁷⁻⁸Kia hãbu iõreki, awimy aõkõ aõhebo rotỹnyymyhỹre ywiõreki, tii Deuxu-ribi aõ ritaõtyhy, irybe inatxire.

⁹Iny aõ ijõkõmy rỹimyhỹre, teysamy rỹirake, aõ ijõdikreki Kristu dori rityhynyre. Kia iaõdimy ityhymy rỹira, tule teysamy rỹike ityhydỹydumy. Rỹiraki aõ ijõõkre hãre. ¹⁰Ityhyna heka iny-ribi wylemy ituemyhỹre kie iwese noijese ramorõmyhỹre wese. Tahe ityhydỹydu mahãdu dee kia aõ aõkõ rare. ¹¹Txutõteetyhy rõhõnymyhỹre dori alõbõrõna rimorõdỹnyymyhỹre. Tahe noijese rejuxunymyhỹre. Tahe iruxerana riixãwidinymyhỹre. Kia wesele hãbu ityhymy rỹire rexihumyhỹre. Aõhebo rotỹnyymyhỹre wetyatxile.

¹²Urihixina inyõdee kanakeu, tahe ijesu binaõ wesemy ritakeki. Tai tahe tii reysakre. Tii tahe umytuedeõna heka Deuxu-ribi ritakre. Deuxu dori kia wahidỹnyamy rarybere taluunadu mahãdu dee. ¹³Inyõ aõbina bina ixirana-di rexirakeki. Tii rarybeõtyhyke Deuxu riixiranymyhỹremy. Inyõ dori Deuxu tiu riurihiõtyhy. Tule Deuxu riixiranyõtyhy aõbina bina widỹy-di. Ixiradỹydu aõkõ tii rare. ¹⁴Kiawese iny ixiribile rexirake, aõ-di sõwemy rõhõtinykeki, tii arabõnyre, araitxenanyre. ¹⁵Kia urari-ribi tahe õraruna rõhõnymyhỹre. Iribi tahe õraruwidỹy-na-ribi rubu rỹimyhỹre. ¹⁶Ixitxenadỹyõmy waluuna mahãdu, waseriõre mahãdu. ¹⁷Wahidỹy-na ibutumy bedeerydỹnyatyhy Deuxu biu-ribi diwahinyde kia ibutumy loosõnatyby-ribi naderi. Tiu heka rawitxiraõtyhy,

tii aõu aõu iweselere. ¹⁸Tii iny ixityre riwinymyhÿre ritÿmyranymyhÿre tatyhyna rybe-di. Tai ibutumy iwidyÿna-ribi inyboho juhuurenre, awirenre.

¹⁹⁻²⁰Idi mohõtinybenyke waluu waseriõre mahãdu. Ibutumy bexiywinmahãbenyke iny-ò boholamyhÿbenyke, tahe aõwimy aõkõ marybeke lau, wymy adebureõmy. Hãbu debure-ribi Deuxu òbitina rahenyõtÿhy. ²¹Abinamy aõhebo tutÿÿnymyhÿte ixi-ribi bitake idi biatyke. Tahe Deuxu rybe-ò boholake, kia dori iruruna dire atyytyby kanatakemy. ²²Kaiboho bede ywina widÿÿdumy, bede ywina tyhydÿÿdumy boibeke. Aõ ijohonadu mahãdulemy aõkõ boibeke. Kiawesekeki bexiitxenanyke. ²³⁻²⁴Inyõ ijohonadule ronykeki, rybemynamy nodu aõkõ rare. Tii hãbu itxerena-di itxerenadu wese rare. Itxerena-di ixidee retehereu, rexieryre iwese raremy. Tahe rexitareu, aõwesele ixi-ribi tõhõti rosare timybo tii rare wahe. ²⁵Inyõ tahe bede ywina òbiti-ò retehemyhÿreki, rityhynymyhÿreki tii tahe teysamy ratxikremy ibutumy aõhebo rotÿÿnykremy. Tii dori ijohonamy nohõti losadu aõkõ rare. Bede ywina rybe widÿÿdu rare, ityhydÿÿna wahe. ²⁶Inyõ bede ywina rybe widÿÿduõmy rõtõtinykeki, tahe tõrõtò riyrubunyõhyymyhÿkeki, tabedeywidÿÿna aõ aõkõ rare. Tii tawokile rexiitxenanyymyhÿre. ²⁷Iny Deuxu, Inytyby-ò kia bede ywina widÿÿna òbiti rare. Uladuwyte, wytese-wana riwiõhenanykemy. Tule aõbina bina aõmydÿÿnana widÿÿõmy.


2 ¹Waseriõre mahãdu, kaiboho Inynyrÿ Jesuisi Kristu, tetyhynytenyte loosõna wedu tii rare. Tai iny wiribi lahitxiõmy, wiweseweselemy iny-di atximahãbenyke. ²Kie inyõ tahe dohodÿÿnawo-ò kanalõkeki, womati debo tÿrÿrÿ-di tywihikÿ-di kanalõkeki, tahe tule iny aõkõdu mahãduõ kanalõkeki. ³Kai tywihikÿ dinodu-ò marybekeki: Kað bodonyke rynawihikÿ-ò. Tahe marybekeki iaõkõ-ò: Kiakile myike lamalemy ada bede-txi aõbo bonyke. ⁴Kia wese wiribi hitxidÿÿ-ki tatÿÿnymyhÿtenyte, araykyreny rabinamy kia wese tumahãre. ⁵Boholake, waseriõreboho, kaiboho juhuu iny aõkõ mahãdu wese toite. Iribi ityhy ityhydÿÿdukõdu mahãdu iaõrarumy roirekemy, kaiboho Deuxu weselemy tadeletenyte atyhyna õraru-ki. Aratamyhÿrenre inatyhyna-di ityhydumy boibekemy, tule kaiboho kowa biu-ò hena bitabenykre. Deuxu dori rarybere: —Waluudu mahãdu tuu arisÿnykre. ⁶Kiawese, kaiboho urimynodu derarenre aõhebo tatÿÿnyteri. Ityhy mahãdu tahe ararutÿÿkÿnymyhÿre tule aradyrenymyhÿre soldadu dohodÿÿna heto-ò. ⁷Tiiboho tule Kristunimy aõbinamy rarybemymyhÿrenre. Kaiboho ini-di texininimyhÿtenyte. ⁸Kia bede ywina rybe-ki roire: iwese ixiluure wese, aerykõdu mahãdu luuke, wery mahãdu wahe, abireludu wahe. Kia bede ywina biywinykeki, awimy botÿÿnymy mabeke. ⁹Tahe iny wiribi lahitxinykeki, taõrarunyteri, teywinyõteri. Bede ywina aõkõ atximahãte. ¹⁰Inyõ tahe bede ywina rybe ibutumy riywinykeki, tahe sohoji aõmydÿÿna riywinyõreki, tai tahe bede ywina rybe ywidÿÿdu aõkõ ratxireri. ¹¹Deuxu tarybe ririre. Kia rarybera: —Òta òta widÿÿõmy. Tule rarybera: —Rubudÿÿõmy. Tai òta òta biwinyõkeki tahe inyõ terubunyteki, kai bede ywina rybe yrubudÿÿdu aõkõ atxiteri. Òrarudumy tate. ¹²Iwese iny bede ywina rybe-di

t̃myra ahābenyke. Deuxu dori bede ywina-di arararutx̃nyrenykre. Taita òbitimy bot̃ỹnybenyke, marybebenyke. ¹³Inyõ riwotðenyõmyh̃ykeki, tule tamy riwotðenyõleke tawiribihitxina-txu-u. Wotðed̃ỹna wiribihitxina ratyre rare.

¹⁴Waseriõre mahādu, inyõ rarybekeki: —Jiar̃y watyhyna ijõdire. Tahe iaõmyd̃ỹna wihik̃y-di aõkõ rare. Kia tahe aõ aõkõhyky heka rare tamy. Ityhynale kahābu ritakekõ aõbo. Tahe reruinyrer̃i. ¹⁵⁻¹⁶Inyseriõreõ tyy, r̃ys̃na ihoõke-wana. Tahe inyõ tamy rarybekeki, ywina-di bõhõnyke, aheto-ki biroxykemy. Tahe aõ riwahinyõra tyy, r̃ys̃na-wana. Aõbohe irybe rare. Aõkõhykyre irybe. ¹⁷Kiawese taheka kia hābu inatyhyna rare, iaõwyd̃ỹna ihoõkeki kia ityhyna ihoõke wese rare. ¹⁸Inyõ rarybeke-wana: —Kai atyhyna dire. Jiar̃y waõwid̃ỹna ijõdire. Biteðsinyke wadee atyhyna sohojile tamyreny wina-di aõkõ. Tahe jiar̃y tamyreny waywina-di adee ariteðsinykre kia òraru-ki bobike jiar̃y Kristumy retyhynyrer̃imy. Watyhyna iny idiõre waõwid̃ỹna ijõõre-wana. ¹⁹Kai bityhynyke Deuxu sohojile raremy. Kia tahe awire urile diabo tyytybybina tule Deuxu rityhynyre. Tai ilau ruberumyh̃yre. ²⁰Inatyhyna iaõmy wid̃ỹnana ihoõkeki, aõ aõkõ wese rare. Kia tetyhynyõlemahāte aõbo, hābu itx̃ytere. ²¹Inylabiereny Abraõ tariõre-di Ijai rixiwenykemy idi ratximyh̃y, kia-ki Deuxu riòbitinyre. ²²Tabimahāte aõbo. Abraõ tatyhyna iwid̃ỹna-wana aõna aõna riwinyre. Ityhyna riwiðhenanyre. ²³Tahe iwese ritid̃ỹnamy roire wesemy tuu rot̃ỹnyre aõmybo heka rarybera Abraõmy: —Boholake, Abraõ heka Deuxu rityhynyre. Tai Deuxu tii riòbitid̃ỹnanyre. Tule, Deuxu tabiðwamy rininire. ²⁴Betehebeny ini. Inyõ iðbitid̃ỹmy ronyke-wana inatyhyna sohojidile aõkõ tii ih̃yke, tahe iwid̃ỹna-di tule wahe. ²⁵Ijõre tahe: Raabe, aderanamy raremyh̃y. Iribi tii Deuxu rybedeòdu mahādu riyrubunyra rubu lau, tahe riteðnyre rywasi wixira-di. Kia wid̃ỹna Deuxu Raabe riòbitid̃ỹnyre. ²⁶Iwese umy tyytyby-di aõkõ rubumy r̃ymyh̃yre wese, tule inatyhyna sohojile aõ aõkõ rare tamywina-di aõkõreki heka rubu wese rare.

3 ¹Uritere, waseriõreboho, bedeeryd̃ỹdu mahādumy aõkõ ixi-di norenkyõmyke. Ibede õnana hitxina txuu dorihe aõnihik̃ykre bede eryd̃ỹdu mahādu dee. ²Inyboho ibutumy sõwemy òraruna-txi aõu aõu resemyh̃yreny. Inyõ tarybe-ki raðrarunyõkeki, tii iny òbiti rare. ³Iwese awaru iny riraðmyh̃yre wese taumy ibutumy riraðmyh̃yre. Awaruru-ki juraròsõna rirutyemyh̃yre, tii iraròsõna-di rare. Tai tahe awaru iny riywinymyh̃yre iumy ibutumy iny riraðmyh̃yre. ⁴Betehebenyke iny heòty lawò nihik̃y-ò iraròsõna iyjatyhyre tahe iraròsòd̃ỹdu idile riraðmyh̃yre titxibo inonana-ò yhy nihik̃y iwetxi kedeakreki, ihārele iraròsõna riraðmyh̃yre. ⁵⁻⁶Iwesele iny dõròtò rare. Iyjatyhyre ihārele aõnihik̃ymy rarybemyh̃yre. Betehebenyke iny heòty hel̃ỹresi iyjare, ihārele òtiranihik̃y ritoonmyh̃yre. Dõròtò tahe heòty wese rare. Sõwemy heka òraru riwinymyh̃yre. Dõròtò bede aõmyd̃ỹnanabina dinodu wese rare, inyumy susud̃ỹdu dõròtò rare. Sõna bede tòtee-ribi diabo mahādu-ribi heka nade. ⁷Ibutumy iròdu brebuna, nawii wixira wixira, iròdu beraludu, utura,

riinytyhydÿnnyhÿre. Iny mahädu iratyre irurudÿna dire. ⁸Inydòròtò inyõ tahe riinytyhydÿnnyõtyhy. Ibinatyhy rare. Rubudÿna uri-di ratxireri. ⁹Inydòròtò-di Deuxu inybybmy iny realämyhÿre tule idi inmy rajõmomyhÿre. Deuxu ixiwesemy iny riwinyre, ihärele iny wimy rajõmomyhÿre. ¹⁰Inyõ tary-di Deuxu rirowòwydynmahäre tule idi ujõmomy reamyhÿre. Waseriðreboho, kiamy aõkõ idi boibeke. ¹¹Bejirana-ribi ibree ihÿre-wana wiule heka rõhònnyõtyhy. ¹²Òwòru inatxi wiribi lahitxire. Ijõ aõbo wiraty-di raratynyke aõkõre? (Figueira azetonamy raratynnyõtyhy) Videira figomy raratynnyõtyhy. Juwyrabe häloo-ribi bebreke rõhònnyõtyhy.



(Txiau 3.4)

¹³Inyõ bederykeki ibedeerynadikeki, tii ywimy ratximyhÿke. Ibutumy õbitimy ratxirerimy aõ riwinymyhÿremy rexityhynmy ixidi rõhõtynyõtyhy tyhymy rabekemy. ¹⁴Kaiboho awo-ki ixiburena ijõdikeki, inywitxira härosu ijõdikeki tai tii deysamy atxiõke tai tuu marybeõke. Kai ruiwidÿyõmy. ¹⁵Kia bedeeryna biu-ribi aõkõ nade, bederibile, iny härosu diaboribile nade. ¹⁶Inywitxira härosu ijõdike-wana, tai jei jeina rare. Ibutumy aõbina bina. ¹⁷Bedeerydÿna biu ludu juhule õbiti rare, idi ywina rare, rutaõna rare, wityhyna rare, ruxetõena rare. Awihyymy nodu widÿna rare. ¹⁸Õbitina aõu aõu kanakre ywinawidÿyõdu-ð. Iwese aloborodu rehumyhÿre wese, tiiboho ywinamy rekoamyhÿrenyre.

4 ¹Aõherekibo ayreny-ki jei jei rÿimyhÿre. Awo-ribi namyhÿde araykywydyna ribi. ²Kai sõwemy aõdikemy tahõtynmahäte aõhebo aõkõ tetate. Tahe terubunymahäte. Inywxira aõmydÿna-di òbire, tahe aõkõre. Tai aõbina tetelenymyhÿte ijei jei-di. Aõ ijõõre textidenyõma häteki. ³Textidenyteki, tetaõmahätenyte. Teðsamy dori textidenymahätenyte. Ixidee sohoji dehunaley tahõtina mahätenyte aumydeewimy behukelemy. ⁴Bede aõmydÿnana luudu mahädu heka Deuxu òludumy ihÿre. Kia aõbo teeryõtenyte, õbitiõna, mahädu. Inyõ bede aõmydÿnana bina biòwamy ratxikeki, Deuxu òludumy rare. ⁵Aõ aõkõ aõbohe rybe riti kawese roire: Aõhe rare. Deuxu taTyytybytyhy inywo-ki heka Deuxu risÿdÿnnyhÿre. Tai tahe iny-di riijetyhymy ratximyhÿre. Aõbo heka kia rare? ⁶Tii tahe iny rirurutedÿnnyhÿre. Kawesemy ritina rarybere: —Ixiwedu mahädu heka Deuxu ixi-ribi rirehedÿnnyhÿre. Tahe ruxetõena sõwemy ixiwedekõ mahädu-ò riwahinyhÿre. ⁷Deuxudeewi biwinymahäke. Diabo ixi-ribi birehedÿnykeki, tahe tii aribi rahenyke. ⁸Deuxu-ò bexiòhòdÿnykeki. Deuxu adee rexiohòdÿnykre. Òrarudu mahädu, ebõmy bexilyraranyke aõraru-ribi bexitake, rybe inatxi mahädu, araykyworeny

biòbitinybenyke. ⁹Mabedewoke, bobuke, mahinyke àòraruna òraru-ki. Ajuedena-ribi arube rytynykre, eysa-ribi mabedewomy atxikemy. ¹⁰Ayrubumy Inynyr̃ko-txi boibekeki, tii aratamadỹnykre; tii ixideewimy riwinykemy.

¹¹Waseriòreboho, uritere aõmy wimy ryberenyõmy. Inyõ taityhydỹduseriòremy tuu ibinamy rarybekeki, iaõna aõna riaõkõkeki tii bede ywina ibinamy rarybereri. Bede ywina rybe riaõkõdỹnyreri. Inyõ bede ywina rybe riaõkõnykeki, tii bede ywina ywidỹdu aõkõ rare. Tii bede ywina rybe hitxidỹdu rare. ¹²Deuxu sohojile dori bede ywina hitxidỹdure. Bede ywina dohodỹna dinodu tii rare. Tii itarasadỹdu rare ihãre irubudỹdule rare. Mobohe kai atxiteri; abireludu hitxidỹmy aõbo texinohõtiddyntyteri? Aõkõre.

¹³Boholabenyke, tuu tarybetenyteri: wijile aõbo ada biurasõmy aõbo rokoirenykre hãwã-ò. Tai bededỹnana sohojimy rikierenykre. Tai nieru tarasamy rakaõmysdỹnykre. ¹⁴Txiòhe rare. Kaiboho dori teeryõlemahãtenyete aõhebo bede rotỹnykre. Timybo mabekre? Iwese biuwetyy yja aõwesele rexihmyhỹre wese heka timybo mabekre? Kiawesemy aõkõ marybeke. ¹⁵Kamy heka marybeke: —Inynyr̃deewikeki iny rumy rokoireke, tai tahe kia ada kowa aõbo rikiwinyrenyke. ¹⁶Iwese wiji ratximyhỹre wese. Biurasou aõnihikỹ widỹmy marybekeki, kia tahe awi aõkõ rare. ¹⁷Inyõ aõwiwidỹ rieryekeki, tahe riwinyõmyhỹ-wana kia rexiòrarunanymyhỹre.

5 ¹Boholabenyke warybe-ò ityhy mahãdu. Mahinybenyke, bobubenyke aõhõkỹmy botỹnybenykreki. ²Aõmydỹnana wiwihikỹ rabinamy rỹire. Atyywytyhy isibrey tysini riròre. ³Aorotỹrỹreny awomatiurareny raruxinyra tabededỹnana riõonyrerimy. Anieru susudỹna awobiredỹnyamy kiditỹnykre. Iwese dee heòty risõmyhỹre wese, kia sudỹ anasõmyhỹkre. Aõna aõna sõwemy ixidee tebutunymahãte kia atxukonana-ò. ⁴Abaderõwysydỹdu òwydỹdu aõkõ dori kai tate. Kai ixideele tebutunymahãte iribireny tawasinymahãte. Tiiboho rahinymy rirajuamyhỹreny tahe kia wysydỹdu mahãdu hina-ò Deuxu roholare. Tii ruru mahãdu wedu rare. ⁵Kaiboho abeòrareny teõonytenyteri isikile. Ixideehyyle texideesadỹnymyhỹte. Ibutumy aõbo adeeremy wiwi ixidee temytenyete, iwese rubutxudỹnatxu broreni riòwenymyhỹre wese. Kai ahãte. Deuxu akanarubunykre. ⁶Òbiti mahãdu teteònymahãte terubunymahãte. Tii tiu adee rexiòwynyòtyhy.

⁷Ixieleledỹõmy tahe waseriòreboho. Inynyr̃ kanakreu. Betehe inihe. Òworudu heka taaõwi riraòmyhỹre biu bedeu. ⁸Kia wese kaiboho tule elelemy aõkõ biraòmyhỹke aworeny-ki beximymyhỹbenyke, Inynyr̃ nonana dori iòhòrehe. ⁹Waseriòreboho uritere wimy ibinamy ryberenyõmy Deuxu dori arahitxinyreny. Ihitxidỹdu nonana tahe iòhòre ijõkiwesele riijemy rỹimyhỹre. ¹⁰⁻¹¹Waseriòreboho ihetxiu Deuxu rybemy rybedu mahãdu iyrubumy rỹiramyhỹ. Iwese tiiboho rỹiramyhỹwese boibeke aõhõkỹmy dỹnana-ki rare. Kia aõhõ kỹmydỹnana-ki òbitimy rotỹnymyhỹre. Iwese Jò ò iyrubumy raremyhỹre taholamahãtenyete. Tule iwese ionanau Deuxu riwiòhenanyre wesemy teerytenyete. Inynyr̃ dori ruxetòenatyhy-di rare làhànatyhy-di.

¹²Ibutu ratyre waseriòreboho inatyhymy sohojilemy marybeke ijõ rybemy rybeõmyke Deuxu arybe ritxiõnyõtyhy. Aõna aõnamydõõnanaribike aõkõ iximyhyyle marybeke. Kohemy marybekeu kohelemy marybeke. Aõkõmy marybekeu, aõkõlemy marybeke. Kawese-ki inyõ aratxiõnyõkre.

¹³Inyõ aõbo ayreny-ki aõhõkõmy rotõõnyreri. Tahe tai bexitõenykre. Inyõ aõbo ayreny-ki teysamy ratxireri. Àlanawi-di tii wana mawiunykre.

¹⁴Inyõ aõbo ayreny-ki webinadumy roireri wana. Tahe dohodõõna rybedu mahãdu-ò tamy bididybedenyke tamy rexitõenyrenykemy. Adõõ ityre ritxiwikemy Inynyrõni òraru-ki. ¹⁵Ixitõedõõna tyhynale webinadu riteytenykre. Inynyrõle ritamahõõnykre. Tii òraru-ò raòrarunymyhõke-wana Deuxu iòraru riixãwidinyke. ¹⁶Iny wiò wiòmy aõna aõnarenymy belyybenyke. Wiò wiòmy wii biixitõedõõnybenyke, ibutu-ribi beytebenykemy. Inyòbiti ixitõedõõna irurudire, aõna aõna sõwemy riwinymyhõke. ¹⁷Eliasi heka inywesereny rare. Tii rexitõenyhyymyhõre biu ràaõtyhykremy bede-ò. Tahe inataõ beòra-di biu ràaõhyre. ¹⁸Tahe ixityre rexitõenyre. Tai biu ràare. Tahe oworu-ki ixityre aõwi ruhunyre.

¹⁹⁻²⁰Waseriòreboho, inyõ ay-ki inatyhyna-ribi rõhõnykeki. Inywitxira tuu rarybekeki, teòsary-ribi ridykeki, tahe itytyby ritara, rubu konana ixãwina lau sõwemy araru-di riixãwidinyre. Kie.